

04/09/1998

Anwar akan ambil tindakan mahkamah

KUALA LUMPUR, Khamis - Datuk Seri Anwar Ibrahim yang dilucutkan daripada Kabinet semalam, akan mengambil tindakan undang-undang bagi mempertahankan kewibawaan diri dan anggota keluarganya.

Setakat ini, katanya, beliau belum disoal siasat oleh polis berhubung tuduhan terhadapnya walaupun polis dikatakan sudah mempunyai dokumen dan bukti mencukupi untuk mendakwanya di mahkamah.

"Saya sudah memulakan proses tindakan undang-undang tetapi setakat ini polis tidak bertanya apa-apapun kepada saya. Saya tidak minta ditanya banyak-banyak. Keputusan yang dibuat, tuduhan yang dibuat, semuanya berdasarkan maklumat sampingan. Saya langsung tidak ditanya atau disoal siasat.

"Mereka menerima surat layang, membuat kesimpulan sendiri dan AG (Peguaan Negara) membuat dakwaan," katanya pada sidang akhbar yang dihadiri lebih 100 pemberita dan jurugambar di kediamannya di Bukit Damansara, petang ini.

Turut hadir ialah isterinya, Datin Seri Wan Azizah Wan Ismail dan setiausaha sulitnya, Azmin Ali.

Anwar dilucutkan daripada jawatan Timbalan Perdana Menteri dan Menteri Kewangan, berkuatkuasa jam 5.30 petang semalam.

Ditanya masa depan politiknya berikutan perkembangan terbaru itu, Anwar berkata: "Kita harus tahu segalanya ditentukan oleh Allah, orang boleh merancang tetapi akhirnya Allah juga akan menentukan."

Beliau berkata, semua tuduhan terhadapnya timbul apabila ada sangkaan kononnya beliau bersiap sedia untuk mencabar jawatan Presiden Umno dalam pemilihan pucuk pimpinan tahun depan.

Menurutnya, beliau mendapat maklumat mengenai cadangan untuk menjatuhkannya sejak tiga bulan lalu serta mempunyai bukti kukuh bagi menangkis segala tuduhan yang dilemparkan kepadanya termasuk rasuah, skandal seks, pembunuhan dan menjadi ejen negara asing.

Beliau juga mendakwa, konspirasi politik yang dilakukan terhadapnya turut membabitkan beberapa ahli Majlis Tertinggi (MT) Umno.

"Ada MT yang kaya, ada korporat, ada yang di luar. Saya ada bukti tetapi saya tidak bersedia menamakan mereka sekarang.

"Dalam surat yang dihantar kepada Perdana Menteri, saya ada menyenaraikan nama ahli MT itu dan ia disahkan oleh laporan polis. Malangnya, tidak ada tindakan diambil, malah tiada nasihat sekalipun kepada mereka," katanya.

Ditanya sama ada Datuk Seri Dr Mahathir Mohamad turut meminta beliau melepaskan jawatan sebagai Timbalan Presiden Umno, Anwar berkata: "Dr Mahathir ada membayangkannya tetapi urusan pelantikan Timbalan Perdana Menteri dan Menteri Kewangan adalah di bawah kuasa Perdana Menteri, manakala jawatan Timbalan Presiden adalah hak perwakilan ... janganlah cuba mengambil alih."

Anwar bagaimanapun enggan mengulas ketika ditanya sama ada beliau kini bersedia mencabar Dr Mahathir bagi merebut jawatan Presiden Umno tahun depan.

Ditanya sama ada beliau bercadang meninggalkan Umno untuk menyertai parti lain, Anwar berkata, beliau akan tetap setia kepada Umno dan tidak akan berbuat demikian.

Bagaimanapun, katanya, pucuk pimpinan Umno sekarang perlu peka dengan tuntutan rakyat terutama membabitkan reformasi.

(END)